

**Uunga siunnersuut: Pinngitsuuisinnaajunnaarnermik katsorsaaneq pillugu Inatsisartut inatsisissaat nr. xx, xx 2018-imeersoq**

(Peqqissutsimut Isumaginninnermut Inatsisinillu Atuutsitsinnermut Naalakkersuisoq)

**Akissuteqaat**

(Peqqissutsimut Isumaginninnermut Inatsisinillu Atuutsitsinnermut Naalakkersuisoq)

**Aappassaaneerneqarnera**

Inatsisissatut siunnersuummut peqqissaartumik suliaqarsimaneq pillugu Naalakkersuisut qujapput aamma maluginiarlugu ataatsimiititaliaq siunnersuut tunngaviusumik iluarisimaaraat.

Katsorsartinnissamut neqeroorutit pinngitsuuisinnaanerup qanoq issusaannut naleqqussassasut Naalakkersuisut isumaqatigaat. Allorfik katsorsaasartut namminersortut peqatigalugit pinngitsuuisinnaajunnaarnermut ajornartorsiutinut katsorsaariaatsit assigiinngitsut neqeroorutigisarpai. Qanittumi Naalakkersuisut meeqqanut inuusuttunullu pilersaarut tusarniaassutigeqqammerpaa atuutilernissaanullu aallartereerluni. Suliniummi meeqqanut inuusuttunullu immikkut ukkassisumik pitsaaliuinnermut suliniutissanik inuusuttut ulluinnaasa katsorsartinnissamut neqeroorummut ikaarsaarfeqartunik pisariaqartitsisoqartoq paasineqarpoq. Aammattaaq meeqqanut aanngajaarniutinik ajornartorsiorfimmi peroriartorsimasunut neqerooruteqartariaqarnissaa paasineqarluni.

Qanigisanut ilaqtariinnullu ujartuutigaluni siunertaqarluartumik suliniuteqarnissaa ataatsimiitilaliap pingaaruteqarnera tikkuuppa. Naalakkersuinikkut kommunillu akornanni ataqatigiissaarinnermi ataatsimiissutigineqaqqammertumi suleqatigiissitamik pilersitsisoqarnissaa akuersissutigineqarpoq, kommunimik suleqateqarneq qanoq pitsanngorsarsinnaaneramik misissuisussamik. Innuttaasoq pinngitsuuisinnaajunnaarnermik katsorsartinneqartoq inooriaatsimut pitsaanerusumut, namminermut ilaqtaminullu iluaqutaasumik, ataqatigiinnerusumik misigisaqartariaqarpoq. Tassani susassaqarfiit akimorlugit suleqatigiinneq pisariaqarluinnarpoq.

Ataatsimiititaliap isumaliutissiisummini namminersorlutik katsorsaasartut periarfissaat ukkatarilluinnarpaat aamma Allorfik pinngitsuuisinnaajunnaarnermik katsorsaarnermik kisermaannginnissaa ukkataraa. Naalakkersuisut tamanna isumaqatigaat taamaattumillu namminersorlutik katsorsaarnermik neqeroorutillit suleqatigineqarlutik. Naalakkersuisut suliarinnittussarsiornermi atortussat saqqummertussani katsorsaarnermut assigiinngitsunik pisariaqartitsineq erseqqissassavai inuiaqatigiinnilu nukiit assigiinngitsut tunniusseqa-taasinnaasut erseqqissarumaarlugit.

Pinngitsuuisinnaajunnaarnermut katsorsaasarnermik suliaqartut tamarmik nalunaarsuinnissamik uppersaanissamillu piunasaqarfigineqassapput, taamaasilluni katsorsartinnerup pitsaassusaa uppersarneqarnera ataatsimi katersorneqarniassammata. Uani katsorsaanerup sunniutaanik naliliineq immikkut pingaaruteqarpoq. Inatsisissatut siunnersuummi periarfissaalerpoq katsorsaasartut tamarmik nuna tamakkerlugu aanngajaarniutinik paasissutissaasivimmut nalunaarusiortarnissaanik piunasaqaateqarsinnaaneq. Taamaasilluni innuttaasup inuunermi pitsaassusaa aamma aanngajaarniutinik ajornartorsiutaa katsorsartinnerup ingerlanerani aamma katsorsartereernerup qaammatit 3, 6 aamma 12 qaangiunnerata kingorna sunniutai malinnaavigineqarsinnaallutik.

Uppersaaneremut piunasaqaatit ersarissarniarlugit Naalakkersuisut peqqussummik tassunga tunngasumut sanassapput.

Ataatsimiititaliap katsorsartinnissamut utaqqisarnerup sivilissusaanik politikikkut anguniakkap nalunaarutigineqarnissaa Naalakkersuisunut kissaatigaa. Naalakkersuisut siunertaraat katsorsartinnissamut pisariaqartitsisut sukkanerpaaq atorlugu katsorsartittassat. Aanngajaarniutinut katsorsartinnissamut neqeroorut amerlasuunik qinnutigineqartarpoq. Ilaqutaasunut aamma najukkami katsorsartinnissamut neqeroorutit annertusiartortillugit amerlanerit katsorsartinnissamut qinnuteqartalerput. Tamatuma kinguneraa katsorsartinnissamut utaqqisoqartalenera. Utaqqisoqartarneranut ajornartorsiut Allorfimmit ataavartumik nikerartumillu isumagineqarpoq.

Ajoraluartumik tarnimikkut ajornartorsiutillit amerlasuut aamma aanngajaarniutinik pinngitsuuisinnaajunnaartarput. Tamanna ajornartorsiutaavoq suliniummik angisuunik piunasaqaatilik, aanngajaarniutinillu atornerluinermik katsorsaasarnermik kisimi aaqqinneqarsinnaangilaq. Suliassamut tassunga tunngatillugu Naalakkersuisut kommunimik suleqateqarnerup pitsaangorsarnissaanut, apeqqutit inuit eqqarsartaatsimikkut napparsimanerminik suussusersineqarsimasut katsorsarneqartarnerat pillugu suliamut ilanngunneqarnissaat isumagissavaat.

Ataatsimiititaliap innuttaasup nammineq katsorsaasarnermut periaatsimik aamma katsorsartinnissamut neqeroorutit siunissami annerusumik toqqaasinnaanissaminut sunniuteqarsinnaanissaa, inatsisissatut siunnersuutip tunniussinnaasaa sinnerlugu, kissaatini saqqummiuppaa kajumissaarutigalugulu § 5 imm. 3 pitsaasarnissamik oqaasertalerneqarnissaa.

Katsorsaasoqarnissaanik aalajangiinnermut tunngaviusut § 13, imm. 3-mi malittarisassiuunneqarput taamaattumillu Naalakkersuisut siunnersuutigaa §5 imm. 3 atorunnaasasoq. Malittarisassat ukupput: siullertut katsorsartinnissamut pisariaqartitat, isumalluutit aamma katsorsartinnissamut periarfissat, aappaattut: katsorsaasarnermik neqeroorutaasoq akornusiinginnerpaasumik naleqquttumillu sunniuteqarsinnaasutut nalilerneqartoq pingajuattullu: sapinngisamik innuttaasup angerlarsimaffianut qaninnerpaaq.

Naalackersuisut ataatsimiititaliap oqaaseqaatai isumaqatigimmassuk, Naalackersuisut inassuteqarput siunnersuut allannguutissatut siunnersuummi ilanngunneqartumi taamatut isikkoqartillugu pingajussaaneerpeqassasoq.